

ննջեցյալը ուզենա տուն վերադառնալ՝ մուտքը չգտնի, քանի որ նրա այդ վերադարձը կարող էր լինել գնացած ծանոթ ճանապարհով, ուստի աշխատում էին այդ ճանապարհը կապել:

Առհասարակ Զանգեզուրումն էլ, ինչպես այլ հայաբնակ գավառներում, ամեն միջոց ձեռք էին առնում դժվարացնելու ննջեցյալի վերադարձը տուն: Այսպես նրա անկողինը թողնում էին ոչ թե պառկելու համար մաքուր հարդարված, պատրաստի սարքված, այլ յոթ օր անլվա և ծալած⁸⁹ կամ ննջեցյալին վերցրած տեղում դնում էին քար: Անկողնի և քարի վրա յոթն օր լացուկոժ էին անում: Քար դնելու սովորությունը Սիսիանում և Ղարաբաղի վարանդա գավառում⁹⁰ բացատրում են այն ցանկություններ, իբր թե որպեսզի մեռնողի «հիշատակը հաստատուն մնա այդ տան մեջ», ասել է՝ ննջեցյալը չմոռանա այդ տունը: Սակայն հնարավոր է և այլ, բոլորովին հակառակ մեկնաբանություն, որը տալիս են օրինակ Կապանի վ. Հանդ գյուղի բնակիչները և որը գրանցված է նաև Բորչալուի հայկական գյուղերում, այն է, որ ննջեցյալի «ոտքը ծանր լինի այդ օջախի վրա և որ նա վերջին մեռնողը լինի այդ տան մեջ»: Քարի ծանրությունը պիտի ծանր դարձներ ննջեցյալի ոտը, եթե փորձի վերադառնալ՝ ոտը ծանր լինի, չկարողանա վերադառնալ, քարն իր ծանրությամբ ծանրացնում էր ննջեցյալի ոտը. «ոչ թե իր տակը կօխոտում, ճխում է մահը», ինչպես ասում է Գ. Չուրսինը⁹¹: Կարելի է ավելի հիմնավորված համարել վ. Հանդ գյուղում տրվող բացատրությունը, քանի որ ամեն միջոց էր ձեռք առնվում, որ ննջեցյալը չմնա իր տան կարոտով, ի վիճակի չլինի վերադառնալու և կարոտից մեկն ու մեկին հետը տանելու: Օխտն անցած՝ քարը հետո էին շարտում՝ ոտքը բոլորովին կտրում էին, անկողինը խնամքով լվանում էին և այդպիսով ննջեցյալի այդ անկողնու վրա պառկած լինելու և նրան պատկանելու հետքերը ոչնչացնում էին: Շորերը լվանալուց հետո տալիս էին լողացնողներին և գերեզման փորողներին, իսկ եթե բաժանում էին ազգականների մեջ, այդ արվում էր ոչ թե նրա համար, որպեսզի ազգականների մեջ նրա հիշատակը կենդանի մնա, այլ որպեսզի նրա կարոտը հեռացվի անմիջական տանեցիներին և բաժանվի ազգականների միջև: Տանեցիները պահում էին իրենց մոտ ննջեցյալի շորից շատ-շատ միայն մի կտոր, որպեսզի տան մեջ ուրիշ մեռնող չլինի, այդ կտորը հագնելու ամբողջական մի բան չէր, որի համար նա ուզեմար վերադառնալ և այդ իրի հետ հեռանալիս որևէ մեկին հետը տաներ: Սպանվածին և առհասարակ ամեն տեսակի ննջեցյալին պիտի ամբողջապես թաղեին: Եթե մնար նրա մարմնի մի մասը, թեկուզ եղունգը, որի միջոցով նա պահում էր նյութական կապը իր ընտանիքի հետ, տան մեջ մեռնող կլիներ: Քահանան հուղարկավորության ժամանակ չպիտի ետ նայեր, կրկին այն պատճառով, որ տանը ուրիշ մեռնող չլինի: Դրանով մեռնողը քահանայի միջոցով արտահայտած կլիներ իր կարոտը կամ իր փափագը տանը մնալու կամ տանեցիներից մեկն ու մեկին իր մոտ տանելու⁹¹: Նույնիսկ այն բահի, քոխրայի երկաթե բերանը, որով գերեզմանն էին փորել, թարս էին նստեցնում փայտե կոթի վրա և բերելով տուն այդպես թարս վիճակի մեջ, յոթ օր պահում էին պարզ է նույն նպատակով՝ շրջելու, թարսեցնելու ննջեցյալի վերադարձը: Թաղման մասնակցածները ժամհացի համար տուն վերա-

⁸⁹ = Արծվանիկ:

⁹⁰ Լալայեան Ե., Զանգեզուր, էջ 102, Վարանդա, էջ 180, Чурсин. Г. Ф., Указ. соч., էջ 243:

⁹¹ СМОМПК, ВЫП. XVII, ОТД. II, էջ 200—201: